

Na osnovu člana 12. stav 3. Zakona o utvrđivanju i načinu izmirenja unutrašnjih obaveza Federacije Bosne i Hercegovine („Službene novine Federacije BiH“, broj:66/04), federalni ministar finansija-federalni ministar financija, d o n o s i

PRAVILNIK

O POSTUPKU VERIFIKACIJE POTRAŽIVANJA ZA STARU DEVIZNU ŠTEDNJU NA TERITORIJI FEDERACIJE BOSNE I HERCEGOVINE

I - OPĆE ODREDBE

Član 1.

Ovim pravilnikom se propisuje način prijavljivanja, potrebni podaci i dokumentacija u postupku verifikacije potraživanja za staru deviznu štednju, koja je uložena u bankama, odnosno najnižim poslovnim jedinicama banaka (podružnica i/ili agencija), na teritoriji Federacije Bosne i Hercegovine (u daljem tekstu: Federacija).

Član 2.

Verifikacija potraživanja za staru deviznu štednju obaviti će se na osnovu podataka u skladu sa Zakonom o utvrđivanju i ostvarivanju potraživanja građana u postupku privatizacije („Službene novine Federacije BiH“, br. 27/97, 8/99, 45/00, 54/00, 32/01, 57/03 i 44/04), i drugim propisima donesenim na osnovu Zakona, i podataka koje posjeduju banke.

Član 3.

U postupku verifikacije banke su dužne svoju bazu podataka provjeriti i učiniti je dostupnom za verifikaciju, sa posljednjim stanjem salda i posebnim iskazom upisane kamate, koja se odnosi na period poslije 31.12.1991. godine.

Podatke iz stava 1. ovog člana banke su dužne dostaviti u Federalno ministarstvo finansija - Federalno ministarstvo financija (u daljem tekstu Federalno ministarstvo), u txt fajlu s delimitrom, sa opisom sloga, koji će sadržavati obrazac koji je sastavni dio ovog pravilnika.

Poslove iz stava 1. ovog člana, banke su dužne završiti u roku od 30 dana od dana stupanja na snagu ovog pravilnika i iste dostaviti Federalnom ministarstvu.

Član 4.

U slučaju nemogućnosti utvrđivanja pojedinačne visine potraživanja zbog nepostojanja dokumentacije, ili zbog drugih objektivnih razloga, banka će Federalnom ministarstvu dostaviti podatke o ukupnom iznosu potraživanja za koje ne postoje pojedinačni podaci ili za koje podaci nisu usaglašeni.

Federalno ministarstvo će za slučajeve iz stava 1. ovog člana dati posebne upute o načinu verifikacije potraživanja u roku od 30 dana od dobivanja podataka iz stava 1. ovog člana.

II- NAČIN PRIJAVLJIVANJA I NAČIN UTVRĐIVANJA PODATAKA

Član 5.

Pod poslovnim bankama, u skladu sa članom 1. ovog pravilnika, podrazumijevaju se:

- HVB-Central-profit banka d.d. Sarajevo (uključujući i Travničku banku d.d, Travnik),
- Privredna banka Sarajevo d.d. Sarajevo (uključujući podatke preuzete iz drugih banaka),
- Una banka d.d. Bihać (za PBS - Osnovna banka, Bihać),
- Union banka d.d. Sarajevo,
- Tuzlanska banka d.d. Tuzla,
- Gospodarska banka d.d. Mostar (za PBS-Osnovna banka Mostar),
- Investiciono komercijalna banka d.d. Zenica,
- LT Gospodarska banka d.d. Sarajevo (bivša PBS-OB Livno).

U procesu verifikacije, matične banke sa sjedištem u Republici Srpskoj, za organizacione jedinice koje su poslovale na teritoriji Federacije, (Drvar, Glamoč, Bosanski Petrovac, Bosansko Grahovo, Ključ, Sanski Most, Bosanska Krupa, Tešanj, Maglaj, Odžak, Ilidža), a koje su u vrijeme od 1992.godine i kasnije bile uključene u matične banke sa sjedištem u Republici Srpskoj, dužne su dostaviti podatke Federalnom ministarstvu.

Matične banke sa područja Federacije, dužne su za poslovne jedinice koje su bile u njihovom sastavu, a sada se nalaze na području Republike Srpske, dostaviti podatke ovlaštenoj instituciji u Republici Srpskoj i Brčko Distriktu Bosne i Hercegovine.

Pod poslovnim jedinicama iz stava 3. ovog člana, podrazumijevaju se slijedeće jedinice:

- Lopare, Rogatica; Sokolac, Ljubinje, Nevesinje, Han Pijesak, Kalinovik, Šipovo, Pale, Trnovo, Brčko i Istočno Sarajevo.

Član 6.

Vlasnik stare devizne štednje (u daljem tekstu: potražilac) obavezan je lično ili putem ovlaštenog opunomoćenika doći u najnižu organizacionu jedinicu Agencije za finansijske, informatičke i posredničke usluge d.d. Sarajevo i Agencije za pružanje finansijskih, informatičkih i posredničkih usluga d.d. Mostar (u daljem tekstu: Agencija) u mjestu njegovog prebivališta ili boravišta, ili mjestu koje je najbliže mjestu njegovog prebivališta ili boravišta, u cilju popune i predaje Registracionog zahtjeva za staru deviznu štednju (u daljem tekstu: Zahtjev). Zahtjev se predaje na propisanom obrascu koji je sastavni dio ovog pravilnika, u roku od 90 dana od dana objave ovog pravilnika, a najkasnije do 28.08.2005. godine, u skladu sa rokom utvrđenim Zakonom o utvrđivanju i načinu izmirenja unutrašnjih obaveza Federacije Bosne i Hercegovine („Službene novine Federacije BiH“, broj 66/04 - u daljem tekstu : Zakon o unutrašnjim obavezama).

Zahtjev za verifikaciju iz stava 1. ovog člana, dobiva se bez naknade u organizacionim jedinicama Agencija, u mjestu prebivališta ili boravišta potražioca stare devizne štednje, odnosno u najbližem mjestu prebivališta ili boravišta potražioca stare devizne štednje.

Član 7.

Državljeni Bosne i Hercegovine, podnosioci zahtjeva za verifikaciju koji ne borave na teritoriji Federacije, a koji su imali staru deviznu štednju u poslovnim jedinicama sa sjedištem na teritoriji Federacije, prijavit će svoja potraživanja organizacionoj jedinici Agencije na način propisan članom 6. ovog pravilnika.

Propisani postupak verifikacije potraživanja iz člana 6. ovog pravilnika, odnosi se i na strane državljane, vlasnike stare devizne štednje, na način da će isti prijaviti svoja potraživanja u organizacionoj jedinici Agencije, prema sjedištu poslovne jedinice banke gdje su strani državljani ulagali staru deviznu štednju, ili u organizacionu jedinicu Agencije koja je najbliža sjedištu poslovne jedinice banke.

Zahtjev iz člana 6. ovog pravilnika, popunjava se na osnovu dokumentacije koju Agenciji prezentira potražilac stare devizne štednje (štedne devizne knjižice, deviznih računa, te pravosnažnog rješenja o nasljeđivanju ukoliko se radi o pravu nasljedstva), kao i na osnovu raspoloživih podataka u Agenciji.

Član 8.

Pravo na potraživanje iz osnova stare devizne štednje ostvaruju i lica koja nakon smrti imaoa stare devizne štednje, potraživanje naslijede na osnovu pravosnažnog sudskog Rješenja o nasljeđivanju.

Pravo na potraživanje ostvaruju i lica koja su potraživanje ostvarila na osnovu ugovora o poklonu živog srodnika.

Pravo na potraživanje iz osnova stare devizne štednje ne mogu ostvariti lica koja su potraživanje stekla kupovinom ili drugim pravnim poslom.

Član 9.

Agencije, imaju obavezu postupiti na slijedeći način:

1) zaprimiti popunjene propisane obrasce – Zahtjeve za staru deviznu štednju, zajedno sa odgovarajućim dokumentima - devizna štedna knjižica, devizni štedni računi, pravosnažno sudsko Rješenje o nasljeđivanju i drugi.

2) uspostaviti bazu podataka koja se sastoji od podataka dostavljenih od strane Agencije za privatizaciju u Federaciji Bosne i Hercegovine (u daljem tekstu: Agencija za privatizaciju), a koji se odnose na inicijalno stanje, promet, te posljednje stanje imaoa stare devizne štednje evidentirano u procesu privatizacije i podataka dobivenih od banaka u skladu sa članom 3. ovog pravilnika.

Podaci navedeni u tački 2) ovog člana dostavljaju se Agenciji putem Federalnog ministarstva.

Pod inicijalnim stanjem iz tačke 2) ovog člana, podrazumijeva se početno evidentirano stanje u Agenciji za privatizaciju u skladu sa Zakonom o potraživanju građana.

Pod prometom iz tačke 2) ovog člana, podrazumijeva se ukupna vrijednost utrošenih potraživanja iz osnova stare devizne štednje, za kupovinu dionica preduzeća, imovine preduzeća i druge imovine u procesu privatizacije, odnosno za kupovinu stanova na kojima postoji stanarsko pravo, odnosno ukupna vrijednost prodatih potraživanja.

Pod posljednjim stanjem, iz tačke 2) ovog člana, podrazumijeva se stanje potražioca stare devizne štednje na dan u skladu sa članom 5a. Zakona o potraživanju građana.

3) zaprimiti deviznu štednu knjižicu svakog potražioca stare devizne štednje koji je pristupio procesu verifikacije;

4) izvršiti poređenje podataka iz devizne štedne knjižice sa podacima iz tačke 2) ovog člana, te izvršiti ispis kamata koje se odnose na period nakon 31.12.1991. godine, a po potrebi i upis kamata do navedenog datuma, ukoliko upis kamata nije izvršen, a odnosi se na period do 31.12.1991.godine;

5) izvršiti poništenje i povrat devizne štedne knjižice, uz izdavanje potvrde o verifikovanom potraživanju, na propisanom obrascu koji je sastavni dio ovog pravilnika.

Potvrda iz tačke 5) ovog člana predstavlja zvanični dokument za izmirenje obaveza iz osnova stare devizne štednje, u skladu sa Zakonom o unutrašnjim obavezama.

6) izvršiti neophodnu obradu podataka i sastaviti izvještaj o izvršenoj verifikaciji potraživanja iz osnova stare devizne štednje po svakom obrađenom zahtjevu.

Oblik i sadržaj izvještaja propisuje Federalno ministarstvo.

Agencija sastavlja zbirni izvještaj o svim verifikovanim potraživanjima sa svim elementima iz pojedinačnih izvještaja.

Član 10.

Stanje koje Agencija utvrdi u potvrdi iz člana 9. ovog pravilnika je konačno stanje potraživanja, preračunato u konvertibilne marke (KM) u skladu sa načinom preračunavanja koji je propisan Zakonom o potraživanju građana.

Član 11.

Agencija iz člana 6. ovog pravilnika, je u obavezi osigurati evidenciju u bazi podataka, kojom će se precizno razdvojiti podaci koji se odnose na staru deviznu štednju koja je u obavezi Republike Srpske i Brčko Distrikta Bosne i Hercegovine, od stare devizne štednje koja se odnosi na Federaciju.

Zadatak Agencije je da sistematizaciju i obradu podataka vrši kontinuirano ili do određenog roka kojeg utvrdi Federalno ministarstvo, s ciljem osiguranja sljedećih podataka:

- iznosa štednje po bankama sa teritorije Federacije;

- prikaz stanja stare devizne štednje za svakog štedišu pojedinačno, s oznakom ukupnog broja štediša i iznosa štednje po određenim grupacijama – rasponima „broj štediša i visina štednje“;

- prikaz broja štediša i iznos štednje po teritorijalnoj pripadnosti.

Agencija je dužna osigurati i sve druge neophodne podatke, izvještaje i preglede, po potrebi i po zahtjevu Federalnog ministarstva, neophodne za uspostavu optimalnog modela izmirenja duga po osnovu stare devizne štednje.

Član 12.

Sve aktivnosti u procesu verifikacije stare devizne štednje, utvrđene ovim pravilnikom bit će predmet nadzora od strane Federalnog ministarstva.

Član 13.

Agencija za privatizaciju će izvršiti korekciju dostavljenih podataka Federalnom ministarstvu o staroj deviznoj štednji za ona lica, imaoce stare devizne štednje koja su se u zakonom propisanom roku (22.08-22.11.04.god), pismeno izjasnila da će istu koristiti u procesu privatizacije u Federaciji.

Ako Rješenje o nasljeđivanju sadrži i visinu potraživanja koje se odnosi na staru deviznu štednju Agencija za privatizaciju će ista proslijediti Federalnom ministarstvu, zajedno sa kompletnom dokumentacijom, koja će biti ažurirana u bazi podataka.

Član 14.

U Federalnom ministarstvu će se uspostaviti rezervna baza podataka, koja će se sedmično ažurirati, a koja je konzistentna sa bazom podataka u Agenciji.

Po okončanju procesa verifikacije potraživanja, Agencija će prenijeti verifikovanu/konačnu bazu podataka imalaca stare devizne štednje Federalnom ministarstvu.

Član 15.

Ovaj pravilnik stupa na snagu narednog dana od dana objavljivanja u „Službenim novinama Federacije BiH“.

MINISTAR

Dragan Vrankić

Broj: 03-02-1907/05
Sarajevo, maj 2005. godine